

18/09/2000

Tugas pulihkan semangat Melayu cabaran utama

KOTA BHARU, Ahad - Kedudukan orang Melayu dan Umno sebagai tonggak kerajaan di negara ini mengharungi ujian besar, berikutan semangat perjuangan orang Melayu dalam parti itu dilihat semakin terhakis.

Ahli Majlis Tertinggi (MT) Umno, Datuk Annuar Musa, berkata malah semakin ramai orang Melayu menjauhkan diri daripada Umno berikutan dakwaan parti itu mula kehilangan pengaruh dan kuasa politiknya.

"Keadaan ini berbeza ketika negara mula mencapai kemerdekaan yang mana Umno menjadi payung perjuangan masyarakat Melayu dan agama Islam.

"Jika senario hakisan sokongan ini berterusan, apakah Melayu mampu terus kekal (menerusi Umno) sebagai tonggak pemerintahan di Malaysia?

"Cabaran ini bergantung sejauh mana kekuatan Melayu yang jumlahnya tidak begitu besar di negara ini... cabaran inilah yang sedang dihadapi Umno," katanya.

Beliau berkata demikian kepada pemberita pada majlis pelancaran amanat ucapan dasar Presiden Umno, Datuk Seri Dr Mahathir Mohamad, di bangunan Umno negeri, di sini, semalam.

Majlis anjuran Umno bahagian Peringat itu dirasmikan Naib Presiden Umno, Tan Sri Muhyiddin Yassin.

Annuar yang juga Timbalan Pengerusi Badan Perhubungan Umno Kelantan, berkata masyarakat Melayu kini mulai berpecah berikutan wujudnya unsur negatif dimainkan parti pembangkang seperti Pas yang memperalatkan agama demi kepentingan politik.

Menurutnya, keadaan bertambah parah apabila segelintir ahli Umno dilihat lebih mementingkan agenda mendapat projek, mencari kuasa dan kepentingan individu tertentu.

"Sebenarnya, apabila kita hilang kedudukan (kemerosotan Umno dalam pilihan raya umum lalu), ramai ahli parti berubah hati dan mengambil keputusan mengundur diri.

"Golongan ini berjuang dalam Umno kerana individu dan pemimpin tertentu selain ingin mencari pengaruh... itulah sebabnya Umno tidak memiliki kekuatan mutlak," katanya.

Annuar berkata, Umno tidak mungkin mengembalikan kekuatan seperti sebelum ini selagi ahlinya tidak memiliki semangat mengukuhkan parti demi membela orang Melayu.

Mengenai Umno di Kelantan, beliau berkata, corak perjuangan di negeri itu perlu diubah dengan memberi ruang lebih luas kepada ahli membuktikan komitmen terhadap parti tanpa memikirkan soal habuan.

Pada masa sama, katanya, ahli Umno di semua peringkat perlu menolak pemimpin yang bekerja bukan untuk parti.

"Inilah cara memulihkan semula Umno di Kelantan. Apabila ada tanda-tanda (pemimpin Umno) tidak berselera kepada parti, pastikan laluan dibuka kepada orang baru yang benar-benar berminat memberi sumbangan kepada Umno," katanya.

(END)